

## CORFF ADNODDAU NATURIOL CYMRU

### DEDDF ADNODDAU DŴR 1991

#### IS-DEDDFAU BRYG GWARCHOD EOGIAID CYMRU 2018

Mae Corff Cyfoeth Naturiol Cymru wrth arfer ei bwerau o dan adran 210, a pharagraff 6(1)(b), 6(2)(aa) a 6(2)(d) o Atodlen 25 ac Atodlen 27 Deddf Adnoddau Dŵr 1991 a'r holl bwerau eraill sy'n ei alluogi yn y cyswllt hwnnw, yn gwneud yr is-ddeddfau brys canlynol ar gyfer gwarchod a chadw pysgodfeydd yng Nghymru.

##### **Is-ddeddf 1 – Teitl**

Gellir galw'r is-ddeddfau hyn yn Is-ddeddfau Brys Gwarchod Eogiaid Cymru 2018.

##### **Is-ddeddf 2 – Defnydd**

(a) Darllenir yr is-ddeddfau hyn ar y cyd ag Is-ddeddfau Gwialen a Llinyn 1995 fel y'u diwygiwyd.

(b) Bydd yr is-ddeddfau hyn yn berthnasol i'r afonydd hynny yng Nghymru lle mae Cyfoeth Naturiol Cymru'n cyflawni ei swyddogaethau sy'n ymwneud â physgodfeydd.

(c) Daw'r Is-ddeddfau hyn i rym ar 1 Ionawr 2019.

##### **Is-ddeddf 3 – Dehongliad**

Yn yr is-ddeddfau hyn, oni bai fod y cyd-destun yn mynnu'n wahanol:

(a) ystyr "Cyfoeth Naturiol Cymru" yw Corff Adnoddau Naturiol Cymru.

(b) ystyr "Is-ddeddfau Gwialen a Llinyn 1995" yw'r is-ddeddfau sy'n rheoleiddio pysgota â gwialen a llinyn ac sy'n gwneud darpariaethau cyffredinol penodol mewn perthynas â materion pysgodfeydd a wneir gan ranbarth Cymru'r Awdurdod Afonydd Cenedlaethol

(c) ystyr "Cymru" yw Cymru gyfan, ynghyd â'r rhan o'r môr tiriogaethol sy'n gyfagos â Chymru hyd at chwe milltir o'r gwaelodlinau y mae lled y môr hwnnw yn cael ei fesur ohonynt.

(d) Ac eithrio fel y darperir uchod neu lle mae'r cyd-destun yn mynnu'n wahanol, bydd yr holl eiriau ac ymadroddion a ddefnyddir yn yr is-ddeddfau hyn yn cael eu diffinio gan yr ystyr a roddir

iddynt gan Ddeddf Eogiaid a Physgodfeydd Dŵr Croyw 1975, Deddf Adnoddau Dŵr 1991 a Deddf yr Amgylchedd 1995 neu unrhyw addasiadau neu ailgread statudol ohonynt.

#### **Is-ddeddf 4 - Tymor Cau Blynyddol ar gyfer Pysgota Eogiaid a Brithyll Mudol ac eithrio gyda Gwialen a Llinyn**

Er gwaethaf dyddiad dechrau'r tymor cau a gynhwysir o fewn is-ddeddfau pysgodfeydd presennol, bydd y tymor cau blynyddol ar gyfer pysgota eogiaid a brithyll mudol, heblaw gyda gwialen a llinyn, o fewn unrhyw flwyddyn galendr, yn dod i ben ar, ac yn cynnwys, 31 Mai gyda'r eithriadau canlynol:

- i) Y pysgodfeydd rhwydi sân ar yr afon Nyfer a'i haber lle bydd y tymor cau blynyddol yn dod i ben ar, ac yn cynnwys 31 Mawrth.
- ii) Y pysgodfeydd rhwydi sân ar yr afon Dyfi a'i haber lle bydd y tymor cau blynyddol yn dod i ben ar, ac yn cynnwys 31 Mawrth.
- iii) Y pysgodfeydd rhwydi sân ar yr afon Tywi a'i haber lle bydd y tymor cau blynyddol yn dod i ben ar, ac yn cynnwys y diwrnod olaf o Chwefror.
- iv) Y pysgodfeydd rhwydi cwrwgl ar yr afon Tywi a'i haber lle bydd y tymor cau blynyddol yn dod i ben ar, ac yn cynnwys y diwrnod olaf o Chwefror.
- v) Y pysgodfeydd rhwydi cwrwgl ar yr afon Taf a'i haber lle bydd y tymor cau blynyddol yn dod i ben ar, ac yn cynnwys y diwrnod olaf o Chwefror.
- vi) Y pysgodfeydd rhwydi sân ar yr afon Teifi a'i haber lle bydd y tymor cau blynyddol yn dod i ben ar, ac yn cynnwys 31 Chwefror.
- vii) Y pysgodfeydd rhwydi cwrwgl ar yr afon Teifi a'i haber lle bydd y tymor cau blynyddol yn dod i ben ar, ac yn cynnwys 31 Chwefror.

## **Is-ddeddf 5 – dal a rhyddhau tymor cynnar ar gyfer eogiaid mewn pysgodfeydd rhwydi penodol**

a) Bydd unrhyw unigolyn sy'n tynnu unrhyw eog byw neu farw:

- (i) o ddyfroedd a nodwyd yn unrhyw un o is-baragraffau i) i vii) o Is-ddeddf 4; ac
- (ii) sydd wedi'i gymryd drwy bysgota rhwyd a nodwyd yn yr is-baragraff hwnnw

heb awdurdod ysgrifenedig Cyfoeth Naturiol Cymru cyn 1 Mehefin o fewn unrhyw flwyddyn calendr, yn euog o drosedd.

(b) Nid yw'r is-ddeddf hon yn berthnasol i unrhyw unigolyn sy'n cymryd eog yn gyfreithiol ac yn ei ddychwelyd i'r dŵr ar unwaith gyda'r anaf lleiaf posibl.

## **Is-ddeddf 6 – dal a rhyddhau tymor cynnar ar gyfer eogiaid â gwialen a llinyn**

(a) Bydd unrhyw unigolyn sy'n tynnu unrhyw eog byw neu farw a gymerir drwy wialen a llinyn o unrhyw ddyfroedd neu lannau cyn 16 Mehefin o fewn unrhyw flwyddyn calendr yn euog o drosedd.

(b) Nid yw'r is-ddeddf hon yn berthnasol i unrhyw unigolyn sy'n cymryd eog yn gyfreithiol ac yn ei ddychwelyd i'r dŵr ar unwaith gyda'r anaf lleiaf posibl.

## **Is-ddeddf 7 – cyfyngiadau tymor cynnar ar ddulliau pysgota am eogiaid â gwialen a llinyn**

Bydd unrhyw unigolyn sy'n pysgota am, cymryd neu wneud ymgais i bysgota am neu wneud ymgais i gymryd unrhyw eog â gwialen a llinyn drwy unrhyw ddull ar wahân i bryf artiffisial neu lith pysgota artiffisial cyn 16 Mehefin o fewn unrhyw flwyddyn calendr yn euog o drosedd.

## **Is-ddeddf 8 – Esemptiadau**

Nid yw'r is-ddeddfau hyn yn berthnasol i unrhyw gyflogai Cyfoeth Naturiol Cymru sy'n gweithredu yn ei rôl swyddogol neu i unrhyw unigolyn sydd, gyda chaniatâd ysgrifenedig Cyfoeth Naturiol Cymru ac yn gweithredu'n unol ag unrhyw amodau sy'n gysylltiedig â'r caniatâd hwnnw, yn gwneud gwaith sy'n gysylltiedig â chynnal a chadw, gwella neu ddatblygu pysgodfeydd at ddibenion gwyddonol.

**TYSTIED HYN OLL GAN SÊL GYFFREDIN  
CORFF CYFOETH NATURIOL CYMRU**

a roddwyd ar y/yr

10

diwrnod o

*Rhagfyr*

2018

*S. Abbey*

**LLOFNODWR AWDURDODEDIG**

